

TUSI TAIALA

MO LE PULEA MA LE VA'AIA LELEI O I'A MA
FIGOTA

O LE AFIO'AGA O

VAISAULU

Aso 07 Oketopa, 1996

SAUNIA:

Pule mamalu a Alii ma Faipule ma tagatanuu o le Afioga o Vaisala, ma le Lagolagosua a le Vaega o Faigafaiva o le Matagaluega o Faatoaga ma Faigafaiva.

1. FAATOMUAGA

O faigafaiva i Samoa e taua tele aua o se tasi lea o auala e maua ai le fofoga taumafa aemaise lava i alalafaga ma afio'aga i tua. I le tele o afio'aga, latou te le'o faatauaina le va'aia lelei o le tamaoaga ma le siosiomaga o le gataifale. O le aumaia ma le faaaogaina o ituaiga faigafaiva faa-onapo nei, e iai mea meanava, upega ma tili mataninii, ma vailaau oona e faamata faigofie ai ma tele i'a maua, ae o loo faatama'ia ai le siosiomaga o le gataifale ma ona tamaoaga. O le faatinoina foi o atinae i le gataifale, ua faaleagaina ai le tele o nofoaga ma le miliona o meaola o loo nonofo ma tautuufua ai. Ina ia faasaoina mai lea tulaga, ua faatuina ai e le Vaega o Faigafaiva o le Matagaluega o Faatoaga ma Faigafaiva se Polokalame mo le Pulega o le Siosiomaga o le Gataifale, ma le Va'aia Lelei o I'a ma Figota, ina ia fesoasoani i le fausiaina o se Pulega faa-faigafaiva i alalafaga ma afio'aga e faasao, pulea, ma fuafua tatau le faaaogaina o le tamaoaga o le gataifale o Samoa.

2. FAAMATALAGA E UIGA I LE AFIO'AGA

2.1 Faamatalaga o Foliga Va'aia Faanatura o le Afio'aga

Faamatalaga	Aofa'iga
O le faitau aofai o tagata o lenei alalafaga	100 - 200
O le aofai o aoga i totonu o lenei afio'aga : Tulagalua : Aoga Faa-Itumalo	
O le aofai o falesa i totonu o le afio'aga : Ekalesia o le Au-Paia o Aso e Gata ai	1
O le umi o le a'au o le afio'aga	500 mita
O le mamao o le a'au mai le matafaga	2 kilomita
O le loloto (futu) o vaega e aupito sili ona loloto o le aloalo pe a pe le tai i le taimi nei	10 futu
O le loloto (futu) o vaega e aupito sili ona loloto o le aloalo pe a pe le tai i taimi ao lei afaina i afa	15 futu

2.2 Faigafaiva

Faamatalaga	Aofa'iga
O le faitau o tamaloloa faifaiva e fagogota i le sili atu ma le tasi le aso i le vaiaso.	5
O le faitauaofai o fafine e fagogota i le sili atu ma le tasi le aso i le vaiaso	3-5
O le aofaiga o tagata e fagogota i tuaau mai le tasi le aso i le vaiaso	3
O le aofaiga o paopao e faaaogaina mo faifaiva i totonu o le afioaga nei	5
O le aofaiga o alia fagota o loo faaaoga mo faigafaiva o le Afio'aga nei	2
E faatagaina ni tagata fagogota mai nisi alalafaga e fagogota i lo outou gataifale?	Ioe

Ituaiga I'a /Figota	Ituaiga Faigafaiva	Taimi faaalu mo le tasi tau'ia/10 i'a/ofu (Hrs)	
		Taimi nei	10 tausaga ua te'a
I'a maua soo (se 5):			
1. Ume	Fagota Moli uila	2 itula	1-1.5 itula
2. Palagi	Fagota Upega	2 itula	0.5 itula
3. Filoa	Fagota Matatao	1-1.5 itula	1 itula
4. Fuafua	Upega/Velovelo	1-2 itula	0.5 itula
5. Lo	Upega/Matatao	1-1.5 itula	0.5 itula
Figota maua soo (se 3)			
1. Gau	Maulu	1-2 itula	0.5 itula
2. Sea	Tuisea	1-2 itula	0.5 itula
3. alualu	Maulu/Faiga alualu	0.5 itula	5 minute

Isi Faigafaiva	Isi Taumafa o le sami	Taimi faaalu mo le 10 Hrs
Tioata	Tuitui	10 minute
Upega	Faisua	Faigata ona maua
Lama (moliuila)	Ula	3-4 itula po o le sili atu
Velovelo (moli penisini)	Pa'a	1-2 itula
Tulituli i luga o le aau	sea	1-2 itula
Matau tuitui	laumei	Seasea ona maua

2.3 Vaega Taua o le Siosiomaga mo Faigafaiva

Vaega	Vaega Taua (Sikuea Mita)	
	Taimi nei	Sefulu tausaga ua te'a
Togatogo	10 sikuea mita	20 sikuea mita
Amu	20,000 sikuea mita	50,000 sikuea mita
Vaovao o le sami	5,000 sikuea mita	2,500 sikuea mita

2.4 Tulafono Faale-nuu i aso ua mavae & aso nei.

O le tele o tulafono i aso ua tuanai o lo'o fa'aaauu ona faaaogaina pea iaso nei. O nei tulafono e i ai: fanaia, ava niukini, vailaau oona ma tuiga.

O le fa'aaogaina o fanai'a ma vaila'au oona ma isi mo fagotaga ua faasaina i Vaisaulu, peitai e iai nisi o tulafono ua maea ona faasalalauina i le leitio (2ap) i aso ua mavae a ua i ai nei suiga ona o ni mafua'aga tatau.

I le aso 3 Oketopa 1996, na pasia ai e le Komiti le aveesea o le tulafono e faasaina ai faigafaiva mai isi Afio'aga ona o ni mafuaaga e pei ona taua i lalo:

- E le mafai ona faatuaoiina le sami
- Ona o le itiiti o le ogasami o lo'o faaaogaina mo fagotaga
- Ua mautinoa foi o le sami mo tagata uma

O le tasi tulafono i aso ua mavae o le lafoaiina lea o otaota i le sami. O lo'o tumau pea lona faamamaluina, a ua i ai nei se suiga i lona faasalaga.

O nei tulafono o lo'o faamamaluina ma amanaiaina e pei ona sa i ai i le taimi muamua faatoga faamamaluina ai i totonuo le Afioaga o Vaisaulu. Ae peitai, e le o mamalu i nei vaitaimi ona o le amanaiaina e isi Afioaga o tulafono a Vaisaulu.

O mafuaaga e pei ona taua e aofia ai:

- Leai o se faamalosiaga a le Malo
- O nisi o tagata o lo'o mafaufau mo le taimi nei ae le o mafaufau i le taimi o i luma faapea foi ma le lumanai manuia o tupulaga.

O nei mafuaaga uma o loo aafia i le Fuafuaga mo le Pulega o le Siosiomaga le Gataifale ma le Vaايا o i'a ma figota o Vaisaulu.

E le gafatia na o le malosi faaletulafono a le Malo ona malu puipuia ai le siosioaga o le gataifale ma ona tamaoaiga. E utiuti tulaga tau tupe ma to'agaogao foi le aufaigaluega a le Malo latou te faamalosiaga ma una'ia tulafono tau faigafaiva i nuu taitasi o Samoa. O le fofu talafeagai o lo'o ii aao o tagata o lo'o soifua a alaala i le Afioaga faatasi ai ma le faamalumaluga a le Fono a Alii ma Faipule. O lenei tali o le le pine ona unaia tagata latou te galulue faatasi ina ia malupuipuia ma faaleleia le siosiomaga o le gataifale ma ona tamaoaiga mo nei ma tupulaga o le lumanai.

3. AUTU

O lenei fuafuaga ua taua ai ni faatinoga e manaomia ina ia maua ai sona taunuuga maumaututu. O le faamoemoe maualuga o le Malo ina ia faaleleia le soifua maloloina ma le manuia o tagata o le Afio'aga, ma ia faatupulaia atili le fofoga taumafa mai le sami. O lea e manaomia ai e tagata uma ina ia avea nei faatinoga e puipuia ai le siosiomaga o le gataifale ma ia fuafua tatau ai le soona fagotaina o i'a ma figota laiti. O nei fuafuaga na faalia e le Komiti Faufautua o le Vaaia lelei o i'a ma figota o le Afioaga e avea ma autu.

“ Ina ia puipuia le siosiomaga o le gataifale ma le toe faatupulaia o i'a ma figota mo tupulaga o le lumanai”

Ua ioeina e le fonotaga a le Komiti i le Aso 3 o Oketopa, o le Fono a Alii ma Faipule latou te faamalosia ma unaia vaega eseese uma o le Afioaga aua le puipuia ma le faasaoina o atinae ma alamanuia o le gataifale o Vaisaulu. O le Komiti o lo'o gafa ma le tapenaga o tulafono aemaise o vaega uma e tatau mo le Afioaga e pei ona taua i luga (Autu). O le tele foi o lenei tapenaga o le a tuuina atu i le pule mamalu a Alii ma Faipule mo le pasiaina.

4. TAPENAGA

O lenei tapenaga sa saunia lava e tagata o le Afioaga o Vaisaulu faatasi ai ma ni fautuaga auiliili ma le lagolagosua a le Ofisa o Faigafaiva o le Matagaluega o Faatoaga, Vaomauta, Faigafaiva ma le Vaaitau. O se oototoga lenei o le tapenaga o le Pulega o le Siosiomaga o le Gataifale ma le Vaaia Lelei o i'a ma figota.

Feiloaiga Muamua: O lenei feiloaiga muamua sa faafesootai lea e Loimata Leena o le Ofisa o Faigafaiva ma Totive Aloaina (FO) i le Aso 2 Setema, 1996, ona o se talosaga mai le Afioaga mo se fesoasoani mo lo latou gataifale.

Fono Muamua: O le tauaofiaga o le fono tele a le Afioaga i le Aso 9 Setema, 1996, na taliaina aloaia ai lenei polokalame ma sa vaevaeina ai loa le mamalu o le Afioaga i ni vaega se tolu.

Vaevaeina o Vaega: O vaega sa vaevaeina i ai e aofia ai Matai, Aumaga ma e Komiti a Tina ma Tamaitai. Sa feiloai nei vaega eseese sui o le ofisa o Faigafaiva (Extension Staff) ma faatalatalanoaina ai faafitauli o le gataifale o lo'o aleia e le Afioaga atoa ai ma ni tali talafeagai e faaono foia ai nei faafitauli.

Komiti Faufautua mo le Vaaia Lelei o I'a ma Figota: I lenei Komiti o lo'o aofia ai sui taitoatolu sa filifilia mai i vaega taitasi latou t4e molia finagalo faaalua o vaega eseese i le fono aitala. O le Komiti la lenei sa latou tuufaataia faamaumauga ma faamatalaga mai i nei vaega taitasi ma sa mafai ai ona latou tapenaina se ata faataitai o le Pulega o le Siosiomaga o le Gataifale ma le Vaaia Lelei o I'a ma Figota. O lenei fuafuaga o lo'o aafia ai lagona o tagata o le Afioaga i le puleaina o faigafaiva ma le siosiomaga o le gataifale.

Tauaofiaga o le Fono Tele: O le a Tauaofia lenei Fono i le Aso 25 Oketopa, 1996 mo le taliaina, fautuaina atoa ai ma se teuteuga o le fuafuaga muamua o le Pulega o le Siosiomaga o le Gataifale ma le Vaaia Lelei o I'a ma Figota.

5. FUAFUAGA FAATAATITIA

O fuafuaga faataatitia o ni gaioga ua faamoemoe e faaono foia ai faafitauli ua faalia ma faailoa mai e vaega eseese o le Afioaga. E lua ituaga o fuafuaga faataatitia ua fuafuaina ma o le fuafuaga ua aupito siii ona taua o fuafuaga faataatitia lea ua faaagaga mo nuu ma Afioaga. O le isi vaega o fuafuaga faataatitia ua faamoemoe lea ma le Ofisa o Faigafaiva ma o lenei fuafuaga o le a tuuina atu ai fautuaga ma fesoasoani aua le tapueina o le faamoemoe e pei ona fuafuaina. O gaioga uma lava ua faamoemoe e faatino ai fuafuaga faataatitia mo le Ofisa o Faigafaiva e ao ona faamaonia e

le Faatonu Lagolago (Faigafaiva) ale Matagaluega o Faatoaga ma Faigafaiva. o nei fuafuaga faataatitia uma ua faamoemoe lo latou faataunuina i le lagolagosua mai o le Afioaga ma ona tagatanuu. O fuafuaga faataatitia o le a fesoasoani ai vaega eseese e pei o aoaga ma faalapotopotoga faa-ekalesia atoa ai ma le suesueina o taulaga eseese o le gataifale e feagai ma atinae.

Na faavae ma pasiaina e le fono ia Setema ni tulafono e aiaia ai nisi o mataupu e pei ona taua:

- O faigafaiva le talafeagai
- Faaititia faigafaiva i le aloalo
- Faatafunaina o le gataifale
- Nisi o vaega faasaina e pei o – ogasami faasaina, faafaatoagaina o i'a ma figota i le sami ma le vai

O se aotelega o nei fuafuaga faataatitia na faapogai mai lea i faatalatalanoaga o faafitauli ma tali talafeagai i fonotaga a vaega eseese o le afio'aga. O nei fuafuaga faataatitia, ua aofia ai faatinoga ma tulafono e pei ona fautuaina e vaega eseese mo le fono mamalu a Alii ma Faipule.

5.1 Ina ia faamalosi Tulafono faale-nuu e faasaina ai faigafaiva le talafeagai i Vaisaulu.

OTOOTOGA

O nisi o faigafaiva ua mautinoa lo latou tulaga ogaoga i le faatamaiaina o le fogatai (amu) ma le tele o meaola o le gataifale, ma o se faaitaiga o nei ituaiga faigafaiva le talafeagai e pei o le vaiala ta-lavalava, ava niukini, tu'iga poo faamo'a, atoa ai ma saeuga ma fanai'a. Ua le gata ina faatamaia ai se vaega tele o le fogatai (amu), ae ua faapena foi ona faaumiumi se taimi e mafai ai ona toe faatupuina le tele o meaola o le gataifale ua aafia mamamate i nei ituaiga o faigafaiva. A faaleagaina le fogatai, o lona uiga o le a leai ni i'a ma ni figota e toe maua ai.

FUAFUAGA FAATAATITIA A LE AFIO'AGA

Ua molimauina e le Afio'aga le malu puipua o pulega faale-nuu i aso nei. I le fonotaga i le Aso 03 o Oketopa, 1996 a le Komiti (KFVL) na molimauina ai le toe faamalosi ma una'ia ai le komiti ina ia toe faasalalauina ma faamautuina atili le tulafono ina ia malu puipua ai tulaga o le atinae aemaise o ogasami faasaina.

FAUTUAGA

Ina ia faatumauina pea ma faamalosi tulafono o loo iai a le Afio'aga mo le faasaina o faigafaiva le talafeagai.

TULAFONO

Ua matua faasaina lava faigafaiva le talafeagai e pei o fana'ia, ava niukini, faamo'a/tu'iga/saeuga, vaiala oona i le gataifale o le Afio'aga o Vaisaulu.

Taimi Fautuaina

Ina ia aloa'ia le faamamaluina ma le faamalosi o leni tulafono pe a mavae le Fono tele e pasia ai le Pulega o le Siosiomaga o le Gataifale ma le Va'aia Lelei o i'a ma figota ia Oketopa, 1996.

Faasalaga Fautuaina

O faasalaga o loo iai nei mo soo se tagata o Vaisaulu e maua ua ia solia le tulafono, e 10 aumatua poo le \$100. O le le usita'ia o leni faasalaga o le a i aao pea o Alii ma Faipule sei vagana ai tagata mai isi Afio'aga, o lona faasalaga o le a molia loa i le tulafono.

Fuafuaga Faataatitia a le Ofisa

O le a fesoasoani le Ofisa o Faigafaiva mo le faatinoina o fuafuaga faataatitia a le Afio'aga ae ala atu i lana polokalame fesoasoani faatasi ma le lagolagosua i faamatalaga ma fautuaga mo le faamautuina o fuafuaga.

5.2 Ia faasalalauina Tulafono a le Afo'aga.

OTOOTOGA

Ua fautuaina e le KFVL le faasalalauina o tulafono a le nuu ua faamoemoe ma fa'agaaga i le puipuga o le siosiomaga o le gataifale ma ona tamaoaga ma faigafaiva. Sa iloilo ina foi e le Komiti e ao ona toe faasalalauina tulafono i aso ua mavae faatasi ai ma nisi o tulafono fou, ina ia mafai ai ona maua le silafia faalauaitetele o le atunuu ma tagata lautele e tusa o aiaiga uma o nei tulafono. Ua ioeina foi e le Komiti i e fonotaga i le Aso 8 o Oketopa, 1996, le faatupeina e le Afio'aga o

faasalalauga uma e faatatau i le puipuia o le siosiomaga o le gataifale.

Fautuaga

Ina ia silafia ai e le atunuu aemaise ai o Afio'aga tua'oi, ma ia faapea foi ona nofouta iai e tusa o faasalalauga ua aiaia.

Autu o le Faasalalauga : “Puipuiga o le Gataifale o Vaisaulu”

Taimi Fautuaina

O le faasalalauina o tulafono uma atoa ma ona aiaiga o le a faataunuuina pe a maea ona pasia e le fonu a Alii ma Faipule o le Afio'aga i le masina o Oketopa.

5.3 Tulafono e taofia ai le faatafunaina o le gataifale – lafoaiina o otaota i le sami ma matafaga.

OTOOTOGA

O se tasi leni o vaega o loo lavea i tulafono ua maea ona faasalalauina ma ua ioeina e le Komiti ina ia toe faaopoopoina lona faasalaga ina ia mafai ona saga una'ia pea le Afio'aga mo lona lelei alu alu i luma. O le faasalaga sa iai muamua e \$10.00 a le tagata na te solia leni tulafono, peitai ua suianei i se faasalaga toe teuteu.

O le lafoai o otaota i le sami ma le matafaga, e faapogai ai le:

- Avea ma nofoaga e tautuufua ai namu, faamanu'alia pe lavevea ai vae o le aufaifaiva i atigi apa ma atigi fagu, ae faapena foi ona avea ma nofoaga o puna'aga o faama'i
- Avea o se nofoaga le talafeagai mo meaola o le sami ma le gataifale.
- Atagia ai tulaga le tumama o se nuu ma ona tagata.

O le foia o nei faafitauli o e atofaina lea o se nofoaga e lafoaiina uma iai otaota a le nuu atoa. E mafai ona lafoaiina otaota i se lua ma ufiufi malu lelei aua le saogalemu mai i faama'i ma siama feavea'i. Talu ai e mafai ona tafe ma ulu atu le oona o lapisi poo vaila'au e lafoaiina i le lua o lapisi, o lea e fautuaina ai le eliina o leni lua o lapisi i se nofoaga mamao ese mai punavai taumafa male sami.

Fuafuaga Faataatitia a le Afio'aga

O nisi o fuafuaga faataatitia a le Afio'aga, o le saunia ma eliina o lua e faaagaaga mo le tuuina iai o lapisi ma otaota e pei ona ta'ua

Tulafono

Ua matua faasaina lava ona toe lafoai lapisi ma otaota e pei o atigi apa, fagu, uamea, pepa iila ma isi i le sami.

Faasalaga

O le solia o leni tulafono, o lona faasalaga e 5 aumatua poo le \$50.00. O le le usita'ia o leni faasalaga o le a tuuia atu loa i aao o Alii ma Faipule.

Fuafuaga Faataatitia a le Ofisa

O le a fesoasoani le Ofisa o Faigafaiva mo le faatinoina o fuafuaga faataatitia a le Afio'aga e ala atu i lana polokalame fesoasoani faatasi ma le lagolagosua i faamatalaga ma fautuaga mo le faamautuina o fuafuaga.

5.4 Ia iloiloina le tulaga talafeagai o le faasaoina o se vaega o e gataifale o le Afio'aga.

OTOOTOGA

O se vaega o le gataifale ua faasaoina, e tatau ona le toe aafia lea i faigafaiva. o le avea o se vaega o le gataifale ma ogasami faasaoina, e ao ona aafia ai le malu puipuia o le siosiomaga ma ona tamaoiga (figota ma i'a). o leni vaega faasao o le a faasaoina ai togatogo, amu, a'au faapea foi i'a ma figota ina ia mafai ona maua e nei meaola le avanoa e tautuufua ma fanafanau ai. O le autu taua lava, o le a avea leni faasao ma puna'aga o i'a ma figota e mafai ai ona faaleleia nisi o vaega o le gataifale ua afaina. O le a fanafanau ma tautuufua i'a ma figotao loo aumau i le vaega faasaoina ma tafeai atu o latou fua fanau ma faatupuina ai meaola i nofoaga ua le maua ai ni i'a ma figota. O le a le pine ae manuia ai i tatou ae faapea foi tupulaga o le lumana'i.

Fuafuaga Faataatitia a le Afio'aga

O le afio'aga e ao ona:

- Galulue faatasi ma le lagolagosua a le aufaigaluega a le Ofisa o faigafaiva i le faatinoina o le iloiloga o le tulaga talafeagai o se vaega o le gataifale o Vaisaulu e avea ma vaega faasaoina.
- Talanoa ma auiliiliina se lipoti ma ia faia iai se faaiuga i le faavaeina o le vaega faasaoina.
- Ia faatinoina loa fuafuaga mo le faavaeina o le vaega faasaoina e pei o le mataituina, tausiga ma le pulea lelei o vaega ua atofaina.
- Ina ia faasalalauina i le ea se maliliea o le Afio'aga ua iai e faasaga i le ogasami faasaoina. O tagata fagogota uam e tataua ona 20 iata le mamao o le vaega o loo fagogota ai, ma le ogasami faasaoina.

Fuafuaga Faataatitia a le Ofisa

O le Ofisa o le a:

- Faatinoina le suesuega o le tulaga talafeagai o se vaega o le gataifale e avea ma vaega faasaoina a'o le'i maea le masina o Oketopa, 1996.
- Suia le lipoti mo le tuuina aloa'ia atu i le Komiti o le Pulega o faigafaiva ma le Fono.
- Pe a tusa ai, o le a tuuina aloa'ia atu ni fautuaga ma ni faamatalaga mo le tausiga, pulea ma le va'aia lelei o le vaega faasaoina o le gataifale o le Afio'aga.

5.5 Ia iloiloina le tulaga talafeagai ma le lelei o le gataifale mo le tufaina atu ma le faa-faatoagaina o i'a ma figota.

OTOOTOGA

O le tufaina atu ua faatatau lea i le aumaia o ni figota poo ni i'a mai se isi atunuu ma tufa atu e faaola i se ogasami ua talafeagai. O le faa-faatoagaina ua faatatau lea i le faaolaina-i-vai o i'a ma figota i se nofoaga ua saunia. O le tufaina atu ma le faafaatoagaina o nisi ia o auala faa-atina'e mo le faatupuina o i'a ma figota aua le fofoga taumafa o se Afio'aga. O nei auala faa-atinae e moomia ai lava le galulue filiga ma le faamaoni o le Afio'aga ina ia ausia se taunuuga lelei.

Faamatalaga faapoopo – Tufaina o figota :

O le tufaina atu ua faatatauina lea i le aumaia o ni figota poo se ituaiga o figota mai se isi atunuu e faaolaina i se ogasami ua talafeagai lelei. O le tufaina o le figota o le aliao i le tele o atunuu o le Pasefika, ua mautinoa ai le tele o ni faamanuiaga na mafai ona seleseleina e nei atunuu. I Fiti na mafai ona toomaga iai tagata i le aano o le aliao e avea ma mea taumafa. O lona atigi na mafai ona faatauina atu e gaosi ai faamau o ofu i fale gaosi mea. I le Atu Kuki, e tusa ma le 280 aliao na tufaina atu iai ma na mafai ona maua mai ai se aofaiga e tusa ma le 200 tone o atigi aliao i le tausaga na faatauina ai i fale gaosi faamau. I le 1990, na tufaina atu ai i sami o le motu o Namu'a i Aleipata le 40 o aliao, ma e le iloa tonu le tulaga ua oo iai nei aliao.

I le tele o vaega o le aloalo ma le a'au o Samoa i Sisifo o loo maua ai figota e pei o le pae, asi ma le tugane. O nei figota ua mautinoa lo latou faaititia talu ai o le fagotaina e tagata mo le fofoga taumafa, ae ua faapena foi ona faatama'iaina o latou nofoaga e afa malolosi. I le tele o nofoaga ua le toe maua ai ni figota, pau le faamoemoe o le aumaia lea o ni figota mai nisi atunuu ma tufaina atu ai aua le faaolaina i nei vaega o le gataifale.

Na faatalosagaina e le KFVL le faia o se aoaoga ma le tuuina atu o ni faamatalaga mo le faaolaina-i-vai o i'a i totonu o Vaisaulu. O le a iloiloina foi e le Ofisa o Faigafaiva le tulaga talafeagai o le faatinoina o lena ituaiga o atina'e i le Afio'aga. Ua le gata foi i lea, ae ua faapena foi ona talosagaina nisi ituaiga figota e mafai ona faaolaina i le gataifale o le afio'aga, e pei o le maso (mussel) sa iai muamua, ma tio (oysters).

FUAFUAGA FAATAATITIA A LE AFIO'AGA

E ao i le Afio'aga ona :

- Galulue faatasi ma le aufaigaluega a le Ofisa o Faigafaiva i le faatinoga o le iloiloga pe talafeagai ma lelei le gataifale o Vaisaulu i le tufaina atu iai o i'a ma figota e faafaatoagaina ai.
- Auiliiliina o le lipoti i suesuega o le talafeagai o le gataifale, ma ia faia se faaiuga i le faatinoina o nei atinae i totonu o Vaisaulu.
- Galulue faatasi mo le leoleoina o nei atinae ma le va'aia o tagata o loo latou faatama'ia ma solia tulafono e faatatau i nei atinae.

FUAFUAGA FAATAATITIA A LE OFISA

- O le a tuuina atu ni fautuaga ma ni faamatalaga mo le tausiga ma le fafagaina o i'a ma figota ua faaolaina-i-vai.
- Pe a tusa ai ma fuafuaga, o le a tuuina atu i'a poo figota mo le tufaina atu i ogasami ua fuafuaina atoa ai ma le faafaatoagaina i vai ua saunia.
- Fesoasoani i le va'aia ma le mataituina o le sologa lelei o le tuputupu ae o figota ua atinaeina.

5.6 Faasoina o Togatogo.

OTOOTOGA

O se tasi foi o itu taua ua maitauina, o le faatama'ia o togotogo o loo ola faataamilomilo i le auvai, ua avea o se auala e lepeti ai nofoaga sa masani ona tautuufua ai nisi o i'a e pei o le fuafua. Ua mautinoa foi o afa e lua ua mavae o se mafua'aga le ma'alofia e le tagata soifua peitai, ua faaopoopo iai ma le taina i lalo mo fafie ma nisi o mana'oga faale-tagata ua avea lea ma itu e faaitiitia ai togotogo ma faasolo ina mou atu.

FUAFUAGA FAATAATITIA A LE AFIO'AGA

Ua fautuaina e le Komiti le taofia ma le faasaina o le taina i lalo o togotogo o loo ola i le gataifale. O loo ua faavaeina ai loa se tulafono e faasaina ai le taina i lalo o togotogo.

TULAFONO

Ua matua faasaina lava ona toe taina i lalo ma faatama'ia ina togotogo o loo i le gataifale o Vaisaulu.

FAASALAGA FAUTUAINA

O lona faasalaga e \$20.00

FUAFUAGA FAATAATITIA A LE OFISA

O se lagolagosua mai le Ofisa o Faigafaiva e ala atu i lana polokalame fesoasoani, o le tuuina atu o ni fautuaga e saga faamautuina ai ma faamaoopoopoina ai foi le Tulafono.

5.7 Ia una'ia Faigafaiva i tua'au ma aoaoga mo faigafaiva.

OTOOTOGA

E mafai ona faaono faaleleia le tamaoaiga i i'a ma figota maua i luga o le a'au ma vaega o le gataifale ua faaleagaina pe afai ae faaitiitia le fagotaina o nei vaega o le gataifale, poo le una'ia o tulaga tau faigafaiva i tua'au ma a'au mamao. O se tasi o auala e faaono faaleleia ai le tamaoaiga o le gataifale, o le fagotaina lea o ogasami o le gataifale e lei fagotaina lava aemaise o tua'au mamao.

Ua iai le talitonuga i le KFVL, e ao ona una'ia ma faamalosia faigafaiva i tua'au ma a'au mamao, ina ia tuumamaina ai le fagotaina o i'a ma figota o le a'au ma le aloalo. Ua le gata foi i lea, ae o le a mafai ai ona toe faatupula'ia ma faaleleia le tamaoaiga o le tele o vaega o le gataifale ua faaleagaina. Talu ai ona o le tele o nuu e leai ni vaa e talafeagai mo fagotaga i tua'au, o lea ua taumafai ai le Ofisa o Faigafaiva e sailia ni vaa talafeagai mo lea faamoemoe.

FUAFUAGA FAATAATITIA A LE AFIO'AGA

Ia talosagaina le Ofisa o Faigafaiva ina ia faatinoina se aoaoga i auala tau faigafaiva e aoaoina ai le autautai o le nuu ma ia faatautaia e se Alii Ofisa ua iai se tomai faapitoa tau faigafaiva.

FUAFUAGA FAATAATITIA A LE OFISA

O le a iloiloina e le Ofisa o Faigafaiva manaoga i auala tau faigafaiva e ao ona fesoasoani ai e aoaoina ai le mamalu o le autautai o le afio'aga. O le itu taua, o le a aafia i nei aoaoga, e pei o le teuina ma le va'aia lelei o i'a, saogalemu i luga o le sami, tausiga o afi o vaa, faaasuina o i'a, ma isi lava mataupu taua.

Faamatalaga faaopoopo – Vaa mo fagotaga i tua'au : O le leai o ni vaa talafeagai mo fagotaga i tua'au, o le ala lea ua avea ma vaegase i le una'ia o faigafaiva i tua'au. E leai se vaa fagota e i le va o le alia ma le paopao, ma o se vaa i lea va ua talitonuina o le a talafeagai mo faigafaiva i tua'au. I saililiga a le Ofisa o Faigafaiva i se vaa talafeagai, ua filifilia ai le vaa e i le va o le 14 – 16 futu, ma lona tau e itiiti ifo o le \$10,000 tuufaatasi iai ma lona afi. O lenei ituiga vaa e mafai ona faaauvaaina e ni tagata se 2 pe 3 foi ma e mafai ona faaogaina lenei vaa i faigafaiva i tua'au. O le a fesoasoani le Ofisa o Faigafaiva i aiga taitasi i mea tau nonoga tupe aua le faatauina o le vaa ma le afi. O le a faia foi ni aoaoga mo le saogalemu i luga o le sami, teuina ma le va'aia lelei o i'a, tausiga o vaa atoa ai ma le faiga o mea fagota.

